

Ijambo ryo kwibuka ku nshuro ya 23 abacu baguye muri jenoside yakorewe abatutsi bari mu Rwanda muri 1994.

Banyarwanda, Banyarwandakazi,

Namwe nshuti z'u Rwanda,

Muri iyi minsi y'icyunamo twibuka abanyawanda baguye muri jenoside yakorewe abatutsi bari mu Rwanda mu mwaka wa 1994. Iyo jenoside ntiyatewe n'ibidukikije nk'imiyaga, umutingito w'isi, imvura nyinshi, amapfa atewe n'izuba ryinshi, cyangwa indwara z'ibyorezo, n'ibindi nk'ibyo. Paul Kagame ni we waciye akagozi ko kuyitangiza (ubwo yicaga Perezida Yuvenali Habyarimana), acengeza bamwe mu basirikare be mu Interahamwe, ayigiramo uruhare rukomeye. Agatsiko k'abagome ka Paul Kagame kashakaga kwifatira ubutegetsi ku ngufu kayigizemo uruhare rugararagara.

Babyeyi, bavandimwe, namwe mwese mwaguye muri jenoside, Imana ibahe iruhuko ridashira! Umwanzi yabishe urubozo abaziza uko mwavutse. Leta y'u Rwanda y'icyo gihe, yari ifite inshingano ikomeye yo kubarinda, ariko iyirengaho, ihitamo kubigarika no kubahiga bukware ngo ibarimbure; yafashe amafaranga y'imisoro mwayihaye, iyakoresha igura intwaro zo kubamaraho.

Ng'uko uko ubutegetsi bubi bukora! Iyo Paul Kagame abishaka ntaba yararetse mwicwa, yari kubarinda nk'uko yarinze umugore we, abana be, umubyeyi we, bashiki be n'izindi nkoramutima ze. Icyo yishakiraga ni uko muba ibitambo byo kugirango yifatire ubutegetsi arenze ku masezerano ya Arusha yo yonyine yari kuramira ubuzima bwanyu.

Uko gushaka kubagira ibitambo yabihamije mu mvugo zinyuranye nk'igihe we n'abambari be bavugaga ko ntawe urya umuleti atabanje kujanjagura amagi.

Mwarapfuye mutuma agera ku cyo yifuzaga: ubu aganje muri Village Urugwiro, abanyarwanda yabagize ingaruzwamuheto ze, u Rwanda yaruhinduye akarima ke, umutungo we uruta umutungo w'abanyarwanda bose babayeho kugeza ubu ndetse ushobora kuba uruta umutungo w'ighugu cyose, yicaye ku ntebe y'ubutegetsi adashaka kuvaho kugirango adashyikirizwa ubutabera kubera uwicanyi bwe ndengakamere. Na n'ubu akomeje kwica abanyarwanda nk'ibimonyo, yabaye inzoberere y'indashyikirwa muri uwo mwuga amazemo imyaka myinshi.

Babyeyi, bavandimwe, namwe mwese mwaguye muri jenoside, ese mugarutse uyu munsi mu Rwanda rwa Paul Kagame mwarusangamo iki? Mwasanga Paul Kagame yaranitse amagufa yanyu hirya hino mu gihugu ngo ayabyaze umusaruro, kandi ayakoreshe mu kuryanisha amoko. Mu minsi y'icyunamo, mwamubona yambaye neza we n'umugore we, agiye gusura rumwe mu nzibutso za jenoside, yitwaje indabyo nyinshi nk'uje kubashimira ko yabagize ikiraro cyo gufata ubutegetsi.

Mwagira agahinda mwitegereeje akaga u Rwanda rurimo kubera Paul Kagame: amagereza yuzuye imbohe, inzara iravuza ubuhuha, amavunja yarembeje abaturage, urubyiruko rurandagaye rwarabuze akazi, ubusumbane bukabije cyane hagati y'abaherwe n'abakene, ubusambanyi buteye isoni, uwicanyi bwa buri munsi n'indi myitwarire mibi iciye ukubiri n'amategeko y'Imana.

Mwakumirwa mwumvise ibinyoma Paul Kagame n'abacurabwenge be bakwirakwiza hose ngo bahagaritse jenoside kandi ahubwo yarayitangije akanayitiza ubukana; batinya ukuri nk'uko umwijima utinya urumuri. Dore ingero eshatu za bimwe muri ibyo binyoma:

1-Gufata abatutsi bavutse jenoside yararangiye kera, n'abatutsi batari mu Rwanda mu gihe cya jenoside, ndetse n'abatutsi bataravuka, abo bose ukabita abacikacumu ni ukugoreka amateka. Dore ukuri: Abacikacumu ni abatutsi, mu gihe cya jenoside, bari mu Rwanda imbere bahigwa bukware n'Interahamwe zifatanyije nabamwe mu ngabo za Paul Kagame hagamijwe kubamaraho.

2-Gufata abahutu bose ndetse n'abataravuka ukabita abajenosideri ni ukuyobya amateka. Dore ukuri: Paul Kagame yohereje bamwe mu basirikare be bacengera Interahamwe, bafatanya nazo kwica abatutsi. Abahutu bose ntibinjiye mu Interahamwe, cyangwa ngo bazitorere kubabera intumwa.

Icyaha ni gatozi. Nta gushyira abahutu bose mu gatebo kamwe, hanyuma ukabita abajenosideri.

Abajenosideri ni: bamwe mu bahutu bari bibumbiye mu mutwe w'Interahamwe hamwe na Paul Kagame wayitangije ahanura indege ya Perezida Juvenali Habyarimana n'agatsiko k'abasirikare bakuru bamurindaga bafatanyije kwohereza zimwe mu ngabo z'inkotanyi (special forces) gucengera mu Interahamwe zigafatanya gukora itsembabwoko n'itsembatsema.

3-Kwemeza ko amagufa yanitse mu nzibutso zose za jenoside ari ay'abatutsi gusa ni ukuyobya amateka. Dore ukuri: Ingabo z'indobanure za Paul Kagame zishe abahutu batagira ingano hirya no hino mu gihugu, zibashyingura mu byobo rusange hirya no hino mu gihugu. Dufite ubuhamya bufatika kandi buhagije bwerekana ko igehe igikorwa cyo gutaburura no gushyira amagufa mu nzibutso cyatangiraga, amagufa y'abahutu nayo yataburuwe agashyirwa mu nzibutso ziri hirya no hino mu gihugu mu rwego rwo gusibanganya ibimenyetso. Amagufa y'abo bahutu yanitse hamwe n'ay'abatutsi mu nzibutso za jenoside. Ayo magufa y'abahutu nayo agomba gushyungurwa mu cyubahiro aho gukomeza gukinirwaho inkinamico kubera inyungu bwite za Paul Kagame.

Ntagushyira ingabo z'Inkotanyi muri rusange cyangwa abatutsi bose mu gatebo kamwe ukabitiranya n'izo ngabo z'indobanure za Paul Kagame zakoze amarorerwa.

Babyeyi, bavandimwe, namwe mwese mwaguye muri jenoside, mwarigendeye turasigara atari uko tubarusha ubwiza; uwabishe yabataye mu rwobo arenzaho igitaka azi ko ibyanyu birangiriye aho, nyamara jenoside mwaguyemo irazwi kw'isi. Ntidushaka ko uwabishe abakurikiza ibinyoma, yiha kubavuga uko yishakiye. Tuzakomeza kubwira abaduteze amatwi ko umwicanyi wese nka Paul Kagame agomba kumenyekana, agafatwa kandi agashyikirizwa ubutabera, bityo umuco mubi wo kudahana umwicanyi uwoariwe wese uzacike mu Rwanda.

Iyo tubibutse, turanezerwa: iyo twibutse ukuntu mwadukundaga mukaduhobera, turushaho kubakumbura no gusaba Imana ngo uwamennye amaraso yanyu imucire urubanza rumukwiye. Urukundo mwadusigiye ni rwo ruzatuma tuzamenagura inkuta z'inzangano Paul Kagame yubatse hagati y'amako, hagati y'imbohe n'abatazi ukuntu umunyururu ugondoza imfungwa y'inzirakarengane, hagati y'abaherwe n'abo inzara yajujubije. Urwo rukundo ni rwo ruzadutera imbaraga zo kubaka u Rwanda rufite inzego zikomeye (strong institutions) zirangwa na demokarasi isesuye, rurwanya ruswa, rudakozwa na gato ubwiru n'ibisigisigi byabwo, ruvumira ku gahera ingoma y'amaraso n'urupfu ya Paul Kagame, rugendera ku mategeko abenegihugu bibonamo kandi bitoreye nta gahato , rufite amahoro n'umuzero, rushimisha Imana muri byose.

Erega kumenya amategeko abiri twumvira bivoroshye:

1-Twanga ibyo Imana yanga: ubwicanyi, ibinyoma, ubusambo, ubusambanyi, ivanguramoko, guhonyora uburenganzira bw'ikiremwamuntu, ubwibone, gusenga ibigirwamana, kugira umutima umeze nk'ibuye utagira ibambe n'imbabazi, kugira akanwa kuzuyemo amagambo ameze nk'uburozi, kugira umutima utazi gusaba imbabazi no kuzitanga, kwibera mu bapfumu, guhishira umurozi ngo adacirwa urubanza, kuba imbata y'inzoga n'ibiyobyabwenge, kwituramira ukaryumaho aho gutabara mugenzi wawe ubona yicirwa mu maso yawe, n'ibindi bikorwa biterwa no kubura urukundo.

2-Dukunda ibyo Imana ikunda: kurebesha abandi amaso y'urukundo rutagira imipaka, kugira umurava, kwemera ko Imana ari Imana ikwiye icyubahiro cyayo cyose, kwanga shitani n'ibyayo byose n'ibisa nayo byose, kugira umutimanama ukeye udafite icyo udushinja, kwibera mu bwiza bw'Imana.

Ukuri twarakumenye, turagucakira ngo kutaducika: amaherezo y'icyaha ni urupfu n'umuriro w'iteka. Abihaye shitani baragowe bikomeye, ni abo gusabirwa. Ntibazi ko intsinzi y'ibibazo by'u Rwanda atari ukurimbura abandi banyarwanda twanga, ahubwo ari ukugirana ibiganiro mu mahoro n'ituze ntawe uhejwe cyangwa uniganwe ijambo, nk'uko Gandhi na Mandela babitweretse. Iyo ni yo nzira nziza y'ibusamo YONYINE tugomba kunyuramo niba dushaka amahoro arambye mu Rwanda.

Paul Kagame yanze iyo nzira y'amahoro ubwo yahitagamo guhanura indege ya Perezida Juvenali Habyarimana bari bamaze kugirana amasezerano y'amahoro no kuyashyiraho imikono, imivu y'amaraso iherako itemba. Abanyarwanda Paul Kagame yahekuye ntibagira ingano. Mu gihe cy'icyunamo, reka tubasabire kandi twese dutakambire Imana, tuyisabe gutabara u Rwanda.

Nihasingizwe Imana yumva amasengesho y'ababaye,
Ni yo mubyeyi w'imfubyi n'abapfakaye
Ni yo twese tuzaruhukiramo.

Yozefu Mutarambirwa, Umuyobozi mukuru w'Ihuriro ry'Inyabutatu-RPRK